



2024/1508

27.5.2024

**CINNEADH (CBES) 2024/1508 ÓN gCOMHAIRLE**

**an 27 Bealtaine 2024**

**Iena leasaítear Cinneadh 2014/145/CBES a bhaineann le bearta sriantacha i ndáil le gníomhaíochtaí lena mbaintear an bonn d'iomláine chríochach, de cheannasacht agus de neamhspleáchas na hÚcráine nó ar bagairt iad na gníomhaíochtaí sin ar an méid sin**

TÁ COMHAIRLE AN AONTAIS EORPAIGH,

Ag féachaint don Chonradh ar an Aontas Eorpach, agus go háirithe Airteagal 29 de,

Ag féachaint don togra ó Ardionadaí an Aontais do Ghnóthaí Eachtracha agus don Bheartas Slándála,

De bharr an mhéid seo a leanas:

- (1) An 17 Márta 2014, ghlac an Chomhairle Cinneadh 2014/145/CBES <sup>(1)</sup>.
- (2) Sna conclúidí uathí an 24 Feabhra 2022, cháin an Chomhairle Eorpach go géar an fogha míleata gan chúis gan údar a thug Cónaidhm na Rúise faoin Úcráin. Leis na gníomhaíochtaí mídhleathacha míleata atá ar siúl aici, tá an dlí idirnáisiúnta agus prionsabail Chairt na Náisiún Aontaithe á sárú go trom ag an Rúis, agus tá an bonn á bhaint aici de shlándáil agus de chobhsaíocht na hEorpa agus an domhain. D'iarr an Chomhairle Eorpach go ndéanfaí pacáiste smachtbhannaí aonair agus eacnamaíocha breise a ullmhú agus a ghlacadh go práinneach. D'iarr an Chomhairle Eorpach ar an Rúis agus ar na foirmíochtaí armtha a bhfuil tacaíocht na Rúise acu éirí as an bhfeachtas bréagaisnéise atá ar bun acu.
- (3) I gconclúidí uathí an 21 agus 22 Márta 2024, d'athdhearbhaigh an Chomhairle Eorpach tacaíocht diongbháilte an Aontais do neamhspleáchas, ceannasacht agus iomláine chríochach na hÚcráine laistigh dá teorainneacha a aithnítear go hidirnáisiúnta agus leis an gceart bunúsach atá aici í féin a chosaint ar fhogha na Rúise. Iarrann sí go ndéanfaí a thuilleadh fós chun cumas na Rúise leanúint dá cogadh foghach a lagú, lena n-áirítear trí na smachtbhannaí a threisiú.
- (4) Thug Cónaidhm na Rúise faoi fheachtas córasach idirnáisiúnta ionramháil na meán agus saobhadh firicí chun feabhas a chur ar a straitéis díchobhsaithe ar a tíortha comharsanachta, agus ar an Aontas agus a Bhallstáit. Go háirithe, dhírigh an bholscaireacht ar pháirtithe polaitiúla Eorpacha arís agus arís eile agus ar bhonn leanúnach, go háirithe le linn tréimhsí toghcháin, agus díriodh chomh maith ar an tsochaí shibhialta, ar iarrthóirí tearmainn ar mhionlaigh eitneacha na Rúise, ar mhionlaigh inscne, agus ar fheidhmiú na n-institiúidí daonlathacha san Aontas agus ina Bhallstáit.
- (5) Chun údar agus tacaíocht a thabhairt don fhogha arna thabhairt aici faoin Úcráin, thug Cónaidhm na Rúise faoi ghníomhaíochtaí bolscaireachta leanúnacha comhbheartaithe dírithe ar an tsochaí shibhialta san Aontas agus ar thíortha comharsanachta, rud a dhéanann firicí a shaobhadh agus a ionramháil go mór.
- (6) Rinneadh na gníomhaíochtaí bolscaireachta sin a sheoladh trí roinnt eagraíochtaí meán faoi bhuanrialú díreach nó indíreach cheannaireacht Chónaidhm na Rúise. Is bagairt shuntasach, dhíreach iad gníomhaíochtaí den sórt sin ar ord poiblí agus ar shlándáil an Aontais. Tá na heagraíochtaí meán sin rithábachtach agus tá ról lárnach acu ó thaobh tacaíocht a thabhairt don fhogha faoin Úcráin agus é a thabhairt chun cinn, agus ó thaobh tacaíocht a thabhairt do dhíchobhsú na dtíortha comharsanachta.
- (7) I bhfianaise thromchúis na staide, is iomchuí bearta sriantacha breise a ghlacadh.
- (8) Measann an Chomhairle go háirithe gur cheart beirt agus eintiteas amháin atá freagrach as gníomhaíochtaí lena mbaintear an bonn d'iomláine chríochach, de cheannasacht agus de neamhspleáchas na hÚcráine nó ar bagairt iad na gníomhaíochtaí sin ar an méid sin, a chur le liosta na ndaoine, na n-eintiteas agus na gcomhlachtaí atá faoi réir na mbeart sriantach a leagtar amach san Iarscríbhinn a ghabhann le Cinneadh 2014/145/CBES.
- (9) Ba cheart, dá bhrí sin, Cinneadh 2014/145/CBES a leasú dá réir,

TAR ÉIS AN CINNEADH SEO A GHLACADH:

*Airteagal 1*

Leasaítear an Iarscríbhinn a ghabhann le Cinneadh 2014/145/CBES i gcomhréir leis an Iarscríbhinn a ghabhann leis an gCinneadh seo.

<sup>(1)</sup> Cinneadh 2014/145/CBES ón gComhairle an 17 Márta 2014 a bhaineann le bearta sriantacha i ndáil le gníomhaíochtaí lena mbaintear an bonn d'iomláine chríochach, de cheannasacht agus de neamhspleáchas na hÚcráine nó ar bagairt iad na gníomhaíochtaí sin ar an méid sin (IO L 78, 17.3.2014, lch. 16).

*Airteagal 2*

Tiocfaidh an Cinneadh seo i bhfeidhm ar dháta a fhoilsithe in *Iris Oifigiúil an Aontais Eorpaigh*.

Arna dhéanamh sa Bhruiséil, an 27 Bealtaine 2024.

*Thar ceann na Comhairle*

*An tUachtarán*

J. BORRELL FONTELLES

---

IARSCRÍBHINN

Cuirtear na daoine agus an t-eintiteas seo a leanas le liosta na ndaoine, na n-eintiteas agus na gcomhlachtaí a leagtar amach san Iarscríbhinn a ghabhann le Cinneadh 2014/145/CBES:

Daoine

|        | Ainm                                                                                                                                                                                | Faisnéis aitheantais                                                                                                                                                                                                                                   | Ráiteas ar Chúiseanna                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                            | Dáta an liostaithe |
|--------|-------------------------------------------------------------------------------------------------------------------------------------------------------------------------------------|--------------------------------------------------------------------------------------------------------------------------------------------------------------------------------------------------------------------------------------------------------|------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|--------------------|
| ‘1753. | <p>Artem Pavlovich MARCHEVSKYI</p> <p>ar a dtugtar freisin Artem Pavlovich MARCHEVSKIJ</p> <p>ar a dtugtar freisin Artëm Pavlovič MARČEVSKIJ</p> <p>(Артем Павлович МАРЧЕВСКИЙ)</p> | <p>Feidhm: Polaiteoir Léiritheoir Meán Bolscaire</p> <p>Dáta breithe: 5.7.1988</p> <p>Áit bhreithe: Cív, APSS, an Úcráin anois</p> <p>Náisiúntacht: Úcráineach, Iosraelach</p> <p>Inscne: fireann</p> <p>Uimhir Aitheantais Cáiníocóra: 3232824038</p> | <p>Iarpholaiteoir Úcránach is ea Artem Marchevskiy, a bhfuil dlúthbhaint aige le Viktor Medvedchuk, iarpholaiteoir agus iarphearsa gnó Úcránach.</p> <p>Ó mhí Aibreáin 2022 i leith, tá Artem Marchevskiy faoi imscrúdú (<i>in absentia</i>) ag Biúró Stáit Imscrúdúcháin na hÚcráine maidir le gníomhartha i gcoinne na hÚcráine.</p> <p>Bhí ról lárnach ag Artem Marchevskiy maidir le branda meán “Voice of Europe” a fháil agus a ghníomhaíocht a ionchorprú i gcuideachta faoi dhliteanas teoranta den ainm céanna a bhfuil sainchónaí uirthi i bPrág. Mar cheannaire ceilte ar Voice of Europe, bhí ról lárnach ag Artem Marchevskiy maidir le bréagaisnéis chomhbheartaithe agus insintí claonta a scaipeadh arb é is aidhm dóibh an bonn a bhaint d’inchreidteacht agus d’iomhá phoiblí na hÚcráine agus dá hiarrachtaí í féin a chosaint ar chogadh foghach na Rúise.</p> <p>Bhain Artem Marchevskiy úsáid as Voice of Europe mar mheán chun acmhainní airgeadais a shóinseáil atá ainmnithe le haghaidh luach saothair bolscairí, agus chun líonra tionchair a thógáil a nascann Medvedchuk agus a chomhlaigh le hionadaithe páirtithe polaitiúla san Eoraip. Dá bhrí sin, tá Artem Marchevskiy ag tacú le gníomhaíochtaí agus beartais, agus cuireann sí chun feidhme iad, ar gníomhaíochtaí nó beartais iad lena mbaintear an bonn d’iomláine chríochach, de cheannasacht agus de neamhspleáchas na hÚcráine agus ar bagairt iad ar an méid sin.</p> | 27.5.2024          |

|       | Ainm                                                                                                                                                                                               | Faisnéis aitheantais                                                                                                                                                                                                                                                               | Ráiteas ar Chúiseanna                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                           | Dáta an liostaithe |
|-------|----------------------------------------------------------------------------------------------------------------------------------------------------------------------------------------------------|------------------------------------------------------------------------------------------------------------------------------------------------------------------------------------------------------------------------------------------------------------------------------------|-----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|--------------------|
| 1754. | <p>Viktor Volodymyrovych MEDVEDCHUK</p> <p>ar a dtugtar freisin Viktor Volodymyrovič MEDVEDČUK</p> <p>(Rúisis: Виктор Владимирович МЕДВЕДЧУК;</p> <p>Úcráinis: Віктор Володимирович МЕДВЕДЧУК)</p> | <p>Feidhm: Polaiteoir, Fear gnó, úinéir meán <i>de facto</i></p> <p>Dáta breithe: 7.8.1954</p> <p>Áit bhreithe: Pochet, Krasnoyarsk Krai, APSS, (Cónaidhm na Rúise anois)</p> <p>Náisiúntacht: Rúiseach</p> <p>Inscne: fireann</p> <p>Uimhir Aitheantais Cáinócóra: 1994214296</p> | <p>Is iarpholaitheoir agus iarphearsa gnó de chuid na hÚcráine é Viktor Medvedchuk, a bhí ar an bpríomhthacadóir le beartas ar son na Rúise san Úcráin agus a chuir beartais agus gníomhaíochtaí chun cinn arb é is aidhm dóibh inchreidteacht agus dlisteanacht Rialtas na hÚcráine a chreimeadh.</p> <p>Tá dlúthnaisc phearsanta ag Viktor Medvedchuk le hUachtarán Chónaidhm na Rúise Vladimir Putin agus tá baint aige leis.</p> <p>Trína chomhpháirtithe, lena n-áirítear Artem Marchevskiy, rinne Viktor Medvedchuk rialú ar eagraíochtaí meán na hÚcráine agus d'úsáid sé iad chun bolscaireacht ar son na Rúise a scaipeadh san Úcráin agus níos faide i gcéin.</p> <p>Tar éis thús chogadh foghach na Rúise ar an Úcráin, scaip Viktor Medvedchuk insintí bolscaireachta na Rúise faoin gcogadh, rud a bhain an bonn de cheannasacht na hÚcráine. Chuige sin, bhunaigh Viktor Medvedchuk gluaiseacht pholaitiúil sa Rúis i mí Aibreáin 2023 ar a dtugtar “Another Ukraine”.</p> <p>Lena chomhpháirtithe agus lena eintitis chomhlachaithe, lena n-áirítear cainéal meán Marchevskiy agus Voice of Europe, lean Viktor Medvedchuk de mhaoiniú a thabhairt agus d'oibríochtaí tionchair a dhéanamh lena ndírítear ar pháirtithe polaitiúla agus ar pholaitheoirí aonair san Eoraip. Áiríodh ar na gníomhaíochtaí sin acmhainní airgeadais a chur ar fáil do ghníomhaithe polaitiúla aonair san Eoraip. Threoraigh agus choinnigh Viktor Medvedchuk smacht ar ghníomhaíochtaí urchóideacha Marchevskiy agus Voice of Europe, agus úsáid á baint aige as treo <i>de facto</i> Voice of Europe Marchevskiy.</p> <p>Dá bhrí sin, tá Viktor Medvedchuk ag tacú le gníomhaíochtaí agus beartais, agus cuireann sí chun feidhme iad, ar gníomhaíochtaí nó beartais iad lena mbaintear an bonn d'iomláine chríochach, de cheannasacht agus de neamhspleáchas na hÚcráine agus ar bagairt iad ar an méid sin.</p> | 27.5.2024';        |

Eintitis

|       | Ainm                   | Faisnéis aitheantais                                                                                                                                                                                                              | Cúiseanna                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                             | Dáta an liostaithe |
|-------|------------------------|-----------------------------------------------------------------------------------------------------------------------------------------------------------------------------------------------------------------------------------|---------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|--------------------|
| '426. | VOICE OF EUROPE S.R.O. | <p>Seoladh: Krakovská 583/9, 110 00 Prág, Poblacht na Seice</p> <p>Áit chlárúcháin: Prág, Poblacht na Seice</p> <p>Dáta clárúcháin: 14.3.2023</p> <p>Uimhir chlárúcháin: CZ05185327</p> <p>Príomhionad gnó: Poblacht na Seice</p> | <p>Is eagraíocht meán ar líne é Voice of Europe, a ghlac páirt i bhfeachtas córasach idirnáisiúnta ionramháil na meán agus saobhadh firicí chun feabhas a chur ar dhíchobhsú na hÚcráine, agus an Aontais Eorpaigh agus a Bhallstát, agus chun údar a thabhairt le cogadh foghach na Rúise san Úcráin.</p> <p>Reáchtálann Voice of Europe suíomh gréasáin, ar a bhfuil cuntais ar Facebook, Youtube, Telegram agus X, agus a scaipeann bréagaisnéis a bhaineann leis an Úcráin go gníomhach agus a chuireann insintí bréagacha ar son na Creimile faoi chogadh foghach na Rúise i gcoinne na hÚcráine chun cinn.</p> <p>Tá Voice of Europe á mhaoiniú agus á stiúradh go rúnda ag Viktor Medvedchuk trína chomhlach Artem Marchevskyi. Is uirlis rithábhachtach í Voice of Europe chun bréagaisnéis chomhbheartaithe agus insintí claonta a scaipeadh arb é is aidhm dóibh an bonn a bhaint d'inchreidteacht agus d'íomhá phoiblí na hÚcráine agus dá hiarrachtaí í féin a chosaint ar chogadh foghach na Rúise.</p> <p>Ina theannta sin, baineadh úsáid as Voice of Europe mar mheán chun acmhainní airgeadais a thonnadh atá ainmnithe le haghaidh luach saothair bolscairí, agus chun líonra tionchair a thógáil a nascann Medvedchuk agus a chomhpháirtithe le hionadaithe páirtithe polaitiúla san Eoraip.</p> <p>Dá bhrí sin, tá Voice of Europe ag tacú go hábharach agus ó thaobh airgid de le gníomhaíochtaí, ar gníomhaíochtaí iad lena mbaintear an bonn d'iomláine chríochach, de cheannasacht agus de neamhspleáchas na hÚcráine agus ar bagairt iad ar an méid sin.</p> | 27.5.2024'.        |